
ՀԱԿՈՒԲ Ա ԵՊԻՍԿՈՊՈՍ ՍՅՈՒՆԵՅՈՒ
ԳՈՐԾՈՒՆԵՈՒԹՅԱՆ ՇՈՒՐՁ (918–958 թթ.)

ՎԱՐԴԱՆ ԱԼԵՔՍԱՆՅԱՆ

Միջնադարյան հայ սկզբնաղբյուրները ուշագրավ տեղեկություններ են հաղորդում IX դարի վերջին և X դարի առաջին կեսին այնուհետև Սյունյաց հոգևոր առաջնորդների մասին: Սյունյաց եպիսկոպոսության գավազանագրքում այդ շրջանում իր գործունեությամբ առանձնանում է Հակոբ Ա եպիսկոպոսը: Վերջինս հայ եկեղեցական պատմագրության մեջ արժանացել է հակասական գնահատականների՝ ծայրահեղ վտանգավորից մինչև իմաստունն ու հանճարեղը: Մի շարք հեղինակների երկերում նա հորջորջվում է «ապստամբ», «հերձուածող» «խոռվարար» մականուններով¹: Մեղադրվում է նույնիսկ Թոնդրակյան շարժմանը և քաղկեդոնականությանը հարելու մեջ: Մեկ այլ տեղ էլ մեծարվում է «այր անձնեայ և սեզ, բնութեամբ ազատ և բանիւ ճոխ, հանճարով պայծառ» խոսքերով²: Անշուշտ, մատենագիրը իր խոսքում նման շոայլություն թույլ չէր տա մի անձնավորության նկատմամբ, ով արժանի չէր դրան: Հակոբ եպիսկոպոսը պատմիչների ոչ միարժեք գնահատականներին է արժանացել վճռական, եռանդուն, համարձակ բնավորության, նաև կազմակերպական ու շինարարական անուրանալի տաղանդի համար:

Տեր Հակոբը Հովհաննես Ե Դրասխանակերտցի կաթողիկոսի (898–929) ազգականներից էր՝ եղբորորդին³: Նա Դվինից էր և մինչև Սյունյաց մետրոպոլիտական այրոռի հովվապետ ձեռնադրվելը ծառայում էր Դվինի կաթողիկոսարանում որպես սենեկապետ, կաթողիկոսի գործակալ և համարվում էր շարքային կրոնավորների ավագ: Ստ. Օրբելյանը

¹ Տե՛ս Ստեփաննոսի Միսեակց Եպիսկոպոսի Պատմութիւն Տանն Սիսական, Բ լոյս բնծայեաց Մկրտիչ Էմին, Մոսկվա, 1861, գլ. ԾԱ, էջ 200, 201, գլ. ՀԱ, էջ 364, Կ ի ր ա կ ո ս Գ ա ն ձ ա կ ե ց ի. Պատմություն հայոց (այսուհետև՝ Կ ի ր ա կ ո ս Գ ա ն ձ ա կ ե ց ի), աշխատասիրությամբ Կ. Ա. Մելիք-Օհանջանյանի, Երևան, 1961, էջ 86, Հաւաքումն Պատմութեան Վարդանայ վարդապետի, Վենետիկ, 1862, էջ 89, Տեառն Անանիայի Հայոց կաթողիկոսի Յաղագս ապստամբութեան տանն Աղուանից.– «Արարատ», 1897, թիվ 9, էջ 130, 132, 141:

² Տե՛ս Ստեփաննոսի Միսեակց Եպիսկոպոսի Պատմութիւն Տանն Սիսական, գլ. ԾԱ, էջ 201:

³ Տե՛ս նույն տեղում, գլ. ԽԸ, էջ 184, Տեառն Անանիայի Հայոց կաթողիկոսի Յաղագս ապստամբութեան տանն Աղուանից, էջ 130:

նրան բնութագրում է որպես արտաքին ակնառու բարեմասնություններ և հարուստ ներաշխարհ ունեցող անձնավորություն. «Այր բարձրահասակ և գեղեցկատեսիլ, հանճարեղ և իմաստուն քաղցրաբարոյ և հեզամիտ, լի ամենայն առաքինությամբ»⁴: Սյունյաց գահերեց իշխան Սմբատի⁵ խնդրանքով Հակոբը մետրոպոլիտ է ձեռնադրվել հենց Հովհաննես Դրասխանակերտցի կաթողիկոսի կողմից 918 թ. և այրոռակալել է մինչև 958 թ.⁶՝ այդ պաշտոնում փոխարինելով Տեր-Հովհաննեսին⁷:

Սյունյաց տան պատմիչը հանգամանորեն շարադրում է տեր Հակոբի վարած թե՛ կրոնադավանաբանական քաղաքականության, թե՛ շինարարական և տնտեսական գործունեության մանրամասները: Միջնադարյան հայ մյուս մատենագիրներն անդրադարձել են Հակոբին գերազանցապես ծիսական, դավանանքային խնդիրներ հարուցելու, Սյունյաց այրոռի անջատողական ձգտումները մարմնավորելու տեսանկյունից:

IX դարի վերջերից թուլացել էին կապերը հայրապետական այրոռի և ծայրամասային թեմերի միջև: Հայոց Արևելից կողմանց և Սյունյաց այրոռները ձեռք էին բերել որոշակի ինքնուրույնություն, և դրանց միաբանված գործունեությունը սպառնալիք էր ստեղծել հայ եկեղեցու միասնականության և ամբողջականության համար:

Խախտելով ավանդույթը և գործող կարգը՝ Սյունյաց մետրոպոլիտ Հակոբ Ա-ն ձեռնադրության, մեռնի և օծման համար այլևս չէր գնում հայոց կաթողիկոսանիստ: Այդ ամենը նա ստանում էր Աղվանքի կաթողիկոսարանից: Սյունյաց մետրոպոլիտության և Աղվանից եկեղեցու միջև այս հարաբերություններն ընդգծված սերտացան 930-ական թվականներին Աղվանքի Սահակ կաթողիկոսի⁸ և նրա հաջորդ Գագիկի օրոք: Սյունիքի և Աղվանքի եկեղեցական միաբանությունը բացահայտ

⁴ Ստեփաննոսի Միւնեաց Եպիսկոպոսի Պատմութիւն Տանն Միսական, գլ. ԽԸ, էջ 184:

⁵ Սմբատը (մոտ 910–958 թթ.), ում Ղ. Ալիշանը □Մեծ□ մակդիրով է որակում, գահերեց իշխան Աշոտի որդին էր՝ Սահակ իշխանի եղբայրը (տե՛ս Ղ. Ալիշան. Միսական, Վենետիկ, 1893, էջ 17, Ստեփաննոսի Միւնեաց Եպիսկոպոսի Պատմութիւն Տանն Միսական, գլ. ԾԸ, էջ 232–233):

⁶ Ստեփաննոսի Միւնեաց Եպիսկոպոսի Պատմութիւն Տանն Միսական, գլ. ԽԸ, էջ 184, գլ. ՀԱ, էջ 364:

⁷ Ըստ Սյունիքի եպիսկոպոսական գավազանագրքի՝ Հովհաննես 5-րդ եպիսկոպոսը վերակառուցել է Տաթևի վանքը և այրոռակալել է 885–918 թթ. (տե՛ս Մ. Օրմանյան. Ազգապատում, հ. Ա, Էջմիածին, 2001, սյունակ 1244, Մտեփաննոս Օրբելյան. Սյունիքի պատմություն, թարգմանությունը, ներածությունը և ծանոթագրությունները Ա. Աբրահամյանի, Երևան, 1986, էջ 456, ծան. 487): Ըստ Ղ. Ալիշանի՝ Հովհաննեսը հովվել է 882–918 թթ. (տե՛ս Ղ. Ալիշան. նշվ. աշխ., էջ 20):

⁸ Սահակը այրոռակալել է 928–947 թթ. (տե՛ս Մտեփաննոս Օրբելյան. Սյունիքի պատմություն, էջ 480, ծան. 792):

էր: Ստ. Օրբէյանը առանձին գլուխ է նվիրել այս խնդրին՝ փորձելով համակողմանիորեն ներկայացնել ստեղծված իրավիճակը. «Էր կաթողիկոս յԱղուանս Սահակ անուն, որ հոգևորական սիրոյ կապակցութեամբ յարակցեալ էր տեսոն Յակոբայ. և էին միմեանց համախոհ և յոյժ մերձաւոր: Եւ յետ Սահակայ յաջորդէր Գագիկ՝ եղբայր նորին. և սա առաւել ևս համարձակեալ էր՝ ի սէր միաբանութեան ընդ Յակոբայ՝ Սիւնեաց եպիսկոպոսի»⁹: Ակնհայտ էր նաև նրանց մեկուսանալը Հայոց կաթողիկոսությունից¹⁰: Այս իրողությունն առավել ակնառու դարձավ այն ժամանակ, երբ նոր կաթողիկոսի ընտրության կապակցությամբ ժողով գումարվեց: Անանիա Մոկացին հատուկ գրությամբ, ի թիվս այլ նշանավոր հոգևոր գործիչների, Աղվանից Սահակ կաթողիկոսին և Սյունյաց Հակոբ եպիսկոպոսին նույնպես հրավիրեց ներկայանալ այդ կարևոր ժողովին: Սակայն նրանք հրաժարվեցին մասնակցել նոր կաթողիկոսի ընտրությանը և պատասխան նամակով հայտնեցին, որ թագավորներն ու եպիսկոպոսներն ում որ ընտրեն Լուսավորչի գահին, իրենք պատրաստ են ծառայել. «Բսկ նա յամառեալ, պնդեալ կաշկանդեալ. և ոչ հաւանէին զայ ի միութիւն ժողովոյն, այլ միայն իւրաքանչիւր ձեռնագրով գրէին, թէ հաւանեալ եմ ես Սահակ Աղուանից կաթողիկոս և սա՝ Յակովբ Սիւնեաց եպիսկոպոս՝ զով և դուք քրիստոսապսակեալ թագաւորքդ և սուրբ եպիսկոպոսունքդ ձեռնադրէք յաթոռ սուրբ Լուսաւորչին՝ ծառայել: Եւ զգալն հրաժարեալ՝ պատճառէին բարանայ բարուրս ստայօղ զօղակապութեամբ»¹¹: Մ. Օրմանյանը նկատում է, որ Սյունյաց Հակոբ մետրոպոլիտը շեղվեց ավանդական ուղուց՝ Աղվանքի Սահակ կաթողիկոսի թելադրանքով¹²:

⁹ Ստեփաննոսի Սիւնեաց եպիսկոպոսի Պատմութիւն Տանն Միսական, գլ. ԾԱ, էջ 200: Տե՛ս նաև Տեառն Անանիայի Հայոց կաթողիկոսի Յաղագս ապստամբութեան տանն Աղուանից, էջ 131:

¹⁰ Այս վիճակը ձևավորվել է Գևորգ Բ Գառնեցի (877–897 թթ.) կաթողիկոսի վախճանվելուց հետո և շարունակվել է հաջորդ հինգ կաթողիկոսների՝ Մաշտոց Ա Եղիվարդեցու (897–898 թթ.), Հովհաննես Ե Դրասխանակերտցու (898–929 թթ.), Ստեփանոս Բ Ռշտունու (929–930 թթ.), Թեոդորոս Ա Ռշտունու (930–941 թթ.) հայրապետության ժամանակ (տե՛ս Ստեփաննոսի Սիւնեաց եպիսկոպոսի Պատմութիւն Տանն Միսական, գլ. ԾԱ, էջ 201): Առանց կաթողիկոսների անունները հիշատակելու այս փաստը իր նշանավոր թղթում հաստատում է նաև Անանիա Մոկացի կաթողիկոսը՝ ասելով, որ այդ վիճակը տևել է 69 տարի. □Տևեալ ապստամբութեամբ զանս ԿԹ. և զժամանակս հայրապետաց հնգից, մինչև ի մեր նուաստութիւնս□ (Տեառն Անանիայի Հայոց կաթողիկոսի Յաղագս ապստամբութեան տանն Աղուանից, էջ 139):

¹¹ Տեառն Անանիայի Հայոց կաթողիկոսի Յաղագս ապստամբութեան տանն Աղուանից, էջ 131: Այս մասին տե՛ս Ա. Զ ա մ ի ն յ ա ն. Հայոց եկեղեցու պատմություն, Նոր-Նախիջևան, 1908, էջ 166:

¹² Տե՛ս Մ. Օրմանյանի նշվ. աշխ., հ. Ա, սյունակ 1269:

Շարունակելով այդ մասին խոսել՝ Օրբելյանը բերում է որոշ արդարացնող հանգամանքներ՝ ասելով, որ արաբների մշտական ավագակային հարձակումների վտանգի պայմաններում հայոց կաթողիկոսներն աստանդական կյանք էին վարում և չունեին կայուն աթոռանիստ. «Երբեմն բնակէին առ Գագկայ թագաւորին՝ ի Վասպուրական՝ ի Վանայ ծովն, ուր կայր սեղանն և աթոռն և գաւազանն սրբոյն Գրիգորի, երբեմն բնակէին ի Շիրակ գաւառի առ Շիրակաւանին՝ ի վանս Արգինայի»¹³: Մշտական նստավայրի բացակայության և հեռավորության պատճառով ամեն տարի Սյունյաց մետրոպոլիտը չէր կարողանում այցելել հայոց կաթողիկոսին և նրանից ստանալ մեռոն. «Այս Յակոբ վասն հեռաւորութեան ոչ կարէր ամ յամէ երթալ առ կաթողիկոսն Հայոց և առնուլ մեռոն. ապա հարկ եղն խնդրել զմեռոն՝ ի կաթողիկոսէն Աղուանից»¹⁴: Պատմիչի խոսքերից կարելի է եզրակացնել, որ հայոց թեմակալ առաջնորդները պարտավոր էին տարին մեկ կամ մի քանի անգամ գնալ կաթողիկոսի մոտ: Դա դիտվում էր իբրև հպատակության նշան, դյուրացնում էր հարաբերությունները հայրապետական աթոռի հետ և, ի վերջո, նպաստում Հայոց եկեղեցու նվիրապետական կարգի ամրապնդմանը: Ստ. Օրբելյանը, անշուշտ, չի արդարացնում իր հայրենակցին՝ գտնելով, որ ինչքան էլ պատճառներ լինեին, դրանք չպետք է էական դեր խաղային և խաթարեին ավանդական հարաբերությունները: Սակայն Հակոբի անձնական մղումներն ավելի շեշտվեցին, և նա մեծամտացալ՝ դառնալով ինքնահավան և գոռոզ: Եկեղեցական մատենագրությունը շեշտված մեղադրանքով է խոսում Հակոբ եպիսկոպոսի մասին: Գանձակեցին արձանագրում է, որ Հակոբը շեղվել է հնավանդ ուղուց և նորամուծություններ է անում հայոց դավանաբանության մեջ, փորձում բարենորոգումներ կատարել նվիրապետական կառուցվածքում. «Յաւուրս սորա (Անանիա Մոկացի կաթողիկոսի – Վ. Ա.) է՛ր եպիսկոպոս մի կողմանցն Միւնեաց, Յակոբ անուն, որ սկսաւ նորաձևութիւնս առնել խօսից և կարգաց»¹⁵: Վերջինս և իր համախոհները¹⁶ գտնում էին, որ եպիսկոպոսը պարտավոր չէ ենթարկվել կաթողի-

¹³ Ստեփաննոսի Միւնեաց Եպիսկոպոսի Պատմութիւն Տանն Միսական, գլ. ԾԱ, էջ 200: Ստ. Օրբելյանը մեջբերում է Մողոմոնի ասույթներից մեկը, թե իմաստունն էլ քուն ունի՝ արանով անուղղակի մեծարելով Հակոբին (տե՛ս նույն տեղում, էջ 201):

¹⁴ Նույն տեղում: Հմմտ. Հաւաքումն Պատմութեան Վարդանայ վարդապետի, էջ 89:

¹⁵ Կ ի ր ա կ ո ս Գ ա ն ձ ա կ ե ց ի, էջ 85:

¹⁶ Գանձակեցին հիշատակում է Հակոբի համախոհներից մեկին, ում անունն էր Խոսրով (տե՛ս Կ ի ր ա կ ո ս Գ ա ն ձ ա կ ե ց ի, էջ 85): Ստ. Օրբելյանը հստակեցնում է, որ դա եղել է Խոսրով Անձևացին: Նա Գրիգոր Նարեկացու հայրն է՝ Անձևացեաց նշանավոր եպիսկոպոսը (տե՛ս Մ տ ե փ ա ն ո ս Օրբելյան. Սյունիքի պատմություն, էջ 480, ծան. 794): Մ. Չալսյանը նույնպես Հակոբի համախոհներից է համարում ոմն Խոսրովի, որին, սակայն, հիշատակում է իբրև քորեպիսկոպոս (տե՛ս Մ. Չ ա մ չ յ ա ն ց. Հայոց պատմություն, հ. Բ, Երևան, 1984, էջ 828, հմմտ. Ղ. Ի ն ճ ի ճ է ա ն):

կոսին, քանի որ նրա գերագահությունը ավելի շատ անվանական է, քան գործնական, այսինքն՝ կաթողիկոսությունն անվանակոչություն է և ոչ նվիրապետական կարգ, հետևաբար, կաթողիկոսը իշխանություն չունի եպիսկոպոսի նկատմամբ¹⁷: Պատմիչը գրում է. «Ոչ է պարտ եպիսկոպոսի ընծայաբեր լինել եպիսկոպոսապետի, այսինքն՝ կաթողիկոսի, զի աւելի օրհնութիւն ո՛չ ունի, ասէ, բայց միայն զանուանակոչութիւնն»¹⁸: Գանձակեցու խոսքերի ուշադիր քննությունը ցույց է տալիս, որ Սյունյաց և հայրապետական աթոռների միջև խախտվել էին ավանդաբար գործող տնտեսական հարաբերությունները. Հակոբը հրաժարվում էր «ընծայաբեր» լինել, այսինքն՝ հրաժարվում էր վճարել հայրապետական աթոռի հարկը՝ տասանորդը, որը ի վերուստ գործել է հայ եկեղեցում: Սա վկայում է, որ Հակոբի ջնդերկայանալը հայոց կաթողիկոսարան պայմանավորված էր ոչ միայն մշտական նստավայրի բացակայությամբ կամ աշխարհագրական հեռավորությամբ, այլև թելադրված էր տնտեսական գործոններով: Ակնհայտ է, որ նահանգային հոգևոր առաջնորդի «ընդվզումը» ուներ նաև տնտեսական շարժանիթ¹⁹: Եկեղեցական տասանորդի և պտղիի կանոնավոր վճարումները բավականաչափ խախտվեցին Թոնդրակյան շարժման գաղափարների ազդեցությունից²⁰:

Ձևավորվել էր այնպիսի մի կացություն, երբ դարերով սրբագործված հայ եկեղեցու նվիրապետական կարգին վտանգ էր սպառնում: Բրատեստրեն գնահատելով ստեղծված կացությունը՝ Հայոց հայրապետ Անանիա Մոկացին (946–968 թթ.) առանց հապաղելու ձեռնամուխ եղավ իրավիճակի գործնական կարգավորմանը²¹: X դարում Հայաստանում քաղաքական միասնական համակարգի բացակայության պայմաններում Հայոց կաթողիկոսության համար առանձնահատուկ կարևորություն ստացավ եկեղեցական և կրոնադավանաբանական միասնության խնդիրը: Հայոց կաթողիկոսը շատ լավ հասկանում էր, որ հայ եկեղեցու

Ստորագրություն հին Հայաստանից, Վենետիկ, 1822, էջ 245): Ըստ Գ. Տեր-Մկրտչյանի՝ Խոսրով Անձնացին ապստամբել է Անանիա Մոկացու դեմ 954 թ. (տե՛ս Գ. Տեր-Մկրտչյանի և ն. Անանիա Մոկացի.– «Արարատ», 1897, թիվ Բ, էջ 93, 94):

¹⁷ Տե՛ս Եզնիկի Պետրոսյանի Հայ եկեղեցու պատմություն, մաս Ա, Հաղթատավանք, 1990, էջ 76:

¹⁸ Գիրալկոս Գանձակեցի, էջ 85–86:

¹⁹ Տե՛ս Լ. Սարգսյանի Հայաստանի նվիրատվական արձանագրությունները IX–XIV դդ., Երևան, 2007, էջ 22:

²⁰ Տե՛ս Բ. Առաքելի և արհեստները Հայաստանում 9–13-րդ դդ., հ. 2, Երևան, 1964, էջ 123:

²¹ Ըստ Սամուել Անեցու՝ Անանիա Մոկացին աթոռակալել է 22 տարի, որից հինգ տարին նստել է Աղթամարում, իսկ 17-ը՝ Վարագում (տե՛ս Սամուելի քահանայի Անեցու Հուարմունք ի գրոց պատմագրաց, Վաղարշապատ, 1893, էջ 99–100, հմմտ. Հուարմունք Պատմութեան Վարդանայ վարդապետի, էջ 89):

ամբողջականությունը և միակենտրոն ուղղահայացը կարելի էր վերականգնել միայն հայոց հայրապետի գերագահությունն անվերապահ ընդունելու դեպքում: Եռանդուն ու գործունյա Անանիա կաթողիկոսը, ում անունը գովեստով է հիշում ժամանակակից պատմիչը²², պատվիրակների միջոցով իր մոտ հրավիրեց համախոհներ Սահակին և Հակոբին: Կաթողիկոսը նպատակ ուներ հորդորներով և նրանց հետ բանակցելով՝ խնդիրը լուծել: Սակայն վերջիններս անհիմն պատճառաբանություններով հրաժարվեցին ներկայանալ: Այդ ժամանակ Անանիան վճռեց անձամբ ուղևորվել Սյունիք. «Եւ սաստիկ ցասամբ շարժեալ եկն ի խնդիր Յակոբայ, զի կամ հնազանդեցէ և ըստ կամի արասցէ, և կամ մեծագոյն պատիժս ընկալցի և անտի դէմ եղեալ երթիցէ յԱդուանս ի գայն ևս հնազանդել»²³: Նրա առաջին այցը Սյունիք տեղի էր ունեցել աթոռակալման հենց առաջին տարում՝ 946 թվականին: Սյունիքում Անանիա հայրապետին մեծ շուքով դիմավորեցին և Տաթևի եպիսկոպոսարան ուղեկցեցին Սիսական Սմբատ և Բաղքի Ջևանշեր²⁴ իշխանները: Այդտեղ մեղայականով ներկայացավ տեր Հակոբը, զոչում հայտնեց իր քայլերի համար և հնազանդության խոստում տվեց. «Ո՞վ մեծապատիւ տէր կաթողիկոս՝ որովհետև աստուածաբար ի մեզ խնարհեցար և զմեր յանդգնութիւնս անտես արարեր, հնազանդիմք ձեզ և սուրբ աթոռոյն Գրիգորի լուսաւորչին իբրև Աստուծոյ. մեղաք յերկինս և առաջի քո, և դու ներելով թող մեզ զյանցանս մեր»²⁵: Անանիան միանգամայն գոհ մնաց ձեռք բերածից: Հանգամանքների բերումով²⁶ չկարողանալով շարունակել ճանապարհը դեպի Աղվանք՝ կաթողիկոսը վերադարձավ իր աթոռանիստ:

Սակայն, իհարկե, այդքան դյուրին չէր միայն խոստումներով և խոսքերով հարթել ստեղծված բարդ կացությունը: Խնդիրն այնքան էր խորացել, որ պահանջում էր տևական բանակցություններ և հետևողա-

²² Ասողիկը Անանիային բնութագրում է որպես «ամեներջանիկ սրբութեամբ գերապատուեալ, բարեշնորհ իւրոց վիճակելոցն» (տե՛ս Ստեփանոսի Տարօնեցոյ Ասողկան Պատմութիւն տիեզերական, Ս. Պետերբուրգ, 1885, էջ 173):

²³ Ստեփանոսի Սիւնեաց Եպիսկոպոսի Պատմութիւն Տանն Սիսական, գլ. ԾԱ, էջ 201: Հմմտ. Տեառն Անանիայի Հայոց կաթողիկոսի Յաղագս ապստամբութեան տանն Ադուանից, էջ 131:

²⁴ Բաղքը Սյունիքի 9-րդ գավառն էր: X–XII դարերում կոչվել է նաև Բաղաց աշխարհ՝ ներառելով Չորք, Կովսական և Արևիք գավառները: Բաղաց իշխան Ջևանշերը Չագիկ 3-րդ իշխանի որդին էր:

²⁵ Ստեփանոսի Սիւնեաց Եպիսկոպոսի Պատմութիւն Տանն Սիսական, գլ. ԾԱ, էջ 202: Հմմտ. Տեառն Անանիայի Հայոց կաթողիկոսի Յաղագս ապստամբութեան տանն Ադուանից, էջ 132:

²⁶ Անանիա Մոկացիի դեռ Սյունիքում էր, երբ հայոց Աբաս (928–953 թթ.) թագավորի կողմից լուր ստացվեց, որ թագուհին վախճանվել է: Հայոց կաթողիկոսը պարտավորված զգաց մասնակցել թագուհու հուղարկավորությանը, այդ պատճառով Սյունիքից անմիջապես վերադարձավ Շիրակ՝ Արգինա:

կան աշխատանք: Կաթողիկոսի հեռանալուց որոշ ժամանակ անց Հակոբը շարունակեց նախկին ընթացքը. դաշնակցել Աղվանքի կաթողիկոսի հետ՝ անտեսելով հայրապետական աթոռի գերագահությունը: Այս իրողությունը հաստատվում է Անանիա կաթողիկոսի՝ Սյունիք կատարած երկրորդ այցի փաստով: 949 թ. Անանիա Մոկացին, իր հետ վերցնելով «զբազմությին սուրբ եպիսկոպոսաց և սուրբ հարանց և գիտնաւոր վարդապետաց», կատարում է երկրորդ ճանապարհորդությունը նախ Աղվանք, ապա՝ Սյունիք²⁷: Այս անգամ Հակոբը չհամարձակվեց ներկայանալ կաթողիկոսին և ապավինեց Ջնանշեր իշխանի պաշտպանությանը Բաղարբերում: Բազմաթիվ նամակներով և գրագրություններով կաթողիկոսը փորձում է նրան իր մոտ բերել և հարթել խնդիրը: Այդ ճանապարհով արդյունքի չհասնելով՝ Խաչեն գավառի Արդախ²⁸ բնակավայրում նա ժողով է գումարում: Ժողովը եղել է օրինական և եկեղեցական ժողովների գումարման կարգին համապատասխան և, ինչպես գրավոր սկզբնաղբյուրներն են վկայում, նաև բավական ներկայացուցչական: Հրավիրված են եղել Սյունյաց թեմի երկու եպիսկոպոսներ. ժողովականների ցանկում վեցերորդը հիշատակվում է Նորավանից վանական հայր Գրիգորեսը, տասնմեկերորդը՝ Մաքենոցաց եպիսկոպոս տեր Հովհաննեսը²⁹: Ժողովի օրակարգի գլխավոր հարցը, անկասկած, խնդրո առարկա հոգևորականների վարքագծի քննությունն էր: Նրանց նկատմամբ ընդունվել են պատժական որոշումներ. պաշտոնանկ են արվել թե՛ Սյունյաց եպիսկոպոսը և թե՛ Աղվանից Գագիկ կաթողիկոսը: Սակայն հայոց կաթողիկոսի ժողովական որոշումները չեն գործադրվել: Պատճառն այն էր, որ և՛ Հակոբ եպիսկոպոսը, և՛ Գագիկ կաթողիկոսը վայելում էին իրենց նահանգների քաղաքական իշխանությունների անվերապահ գորակցությունն ու հովանավորությունը: Նրանք շարունակել են պաշտոնավարել ևս ինը տարի: 949–950 թթ. ձմռանը կաթողիկոսը վերադառնում է Արգինա, սակայն չի դադարում թղթերով և գրություններով նրանց հնազանդեցնելու իր փորձերը. «Եւ սկսեալ յայսմհետէ և յապա բագում ջանիւք և անբաւ թղթագնացութեամբ հնարէաք և զօրհանապագ զարտօսրաթոյր վտակս

²⁷ Տե՛ս Գ. Տեք - Մկրտչեան. Անանիա Մոկացի. «Արարատ», 1897, թիվ Բ, էջ 92: Հմմտ. Ա. Զամիսյան. նշվ. աշխ., էջ 168:

²⁸ Պատմաբան Վ. Վարդանյանը գտնում է, որ Արդախ բնակավայրը գտնվել է Սյունիքի ճահուկ գավառում (տե՛ս Քրիստոնյա Հայաստան, հանրագիտարան, Երևան, 2002, էջ 49): Բսկ Բ. Ուլուբաբյանը, որպես աղբյուր ունենալով ակադեմիկոս Բ. Պիտրովսկուն, Արդախը նույնացնում է Արցախ աշխարհի հետ. այն Արցախի սեպագրային անվանումներից է (տե՛ս Բ. Ուլուբաբյան. Հայոց Արևելից կողմանց եկեղեցին և մշակույթը, Երևան, 1998, էջ 6, 166):

²⁹ Տե՛ս Տեառն Անանիայի Հայոց կաթողիկոսի Յաղագս ապստամբութեան տանն Աղուանից, էջ 134:

և զաղերսալի հառաչանս ի ժամ պատարագին առաջի զենլոյն Քրիստոսի հեղուլ: Եւ լինէր այս ի թուականութեանն հայոց, ՅՂԸ. (398) տառապանաց մերոց»³⁰: Իրերի այս վիճակը շարունակվում է մինչև 958 թ., երբ մահանում են Սյունյաց Հակոբ եպիսկոպոսն ու Աղվանից Գագիկ կաթողիկոսը: Անխոնջ կաթողիկոսը, հանուն Հայոց եկեղեցու ամբողջականության, 959 թ. երրորդ այցն է կատարում Սյունիք³¹: Նրան դիմավորում են նախկինում բանադրված Ջևանշեր³² իշխանը և Սյունյաց Սմբատի որդի գահերեց իշխան Վասակը³³: Հակոբի մահից հետո Սյունիքում, ամենայն հավանականությամբ, անորոշ վիճակ էր ստեղծվել, քանի որ Անանիա կաթողիկոսը որոշ ժամանակ մնում է Կապանում, հանդարտեցնում իրավիճակը, կարգավորում թեմի կարգավիճակի խնդիրները: Անանիան Սյունյաց նոր առաջնորդ է ձեռնադրում Վահանին, ով Ջևանշերի որդին էր և Վահանավանքի միաբանության հովիվը: Դատելով կատարած գործերի ծավալից՝ Անանիան տևական ժամանակ մնացել է Սյունիքում և Վահանի ձեռնադրությունը կատարել 961 թ.³⁴: Կաթողիկոսը երդման և հավատարիմ հպատակության երկարաշունչ զիր է վերցնում Վահանից և Սյունյաց իշխաններից: Դրանց իմաստն այն էր, որ նրանք այսուհետ երբեք չպետք է շեղվեին հայ եկեղեցու նվիրապետական կարգից և գնային խոտոր ճանապարհով³⁵: Երդմնագիրն ավարտվում է սուսկալի նզովքներով. «Ձի մի որ իշխեսցէ յեպիսկոպոսաց զՅակոբայն գործել կամ խոկալ կամ խորհել ոճիրս. և զի մի որ յիշխանաց իշխեսցէ այնպիսոյն թեկն ածել և օգնական կամ ջատագով լինել. և եթէ յանդգնի որ յեպիսկոպոսաց՝ փութապէս ի ձեռս տացեն կաթողիկոսին Հայոց և մի լիցին դարան և ասպնջական նմա»³⁶:

³⁰ Նույն տեղում, էջ 139: Հմմտ. Ստեփաննոսի Միւնեաց Եպիսկոպոսի Պատմութիւն Տանն Սիսական, գլ. ԾԱ, էջ 207:

³¹ Տէ՛ս Մ. Օր մ ա ն յ ա ն. նշվ. աշխ., սյունակ 1275: Մեծանուն պատմաբան Ն. Աղոնցը ավելի ստույգ է համարում 956 թ. (տե՛ս Ն. Աղոնց. Երկեր, հ. Բ, Երևան, 2006, էջ 322):

³² Իր հայտնի թղթում Անանիան Ջևանշերին անվանում է «Բաղաց բռնակալ» (տե՛ս Տեառն Անանիայի Հայոց կաթողիկոսի Յաղագս ապստամբութեան տանն Աղուանից, էջ 141):

³³ Վասակ Զ իշխանը գահակալել է մոտ 958–963 թթ. (տե՛ս Ղ. Ալիշան. նշվ. աշխ., էջ 17, հմմտ. Հր. Աճառյան. Հայոց անձնանունների բառարան, հ. Ե, Երևան, 1962, էջ 49):

³⁴ Տէ՛ս Մ. Օր մ ա ն յ ա ն. նշվ. աշխ., սյունակ 1276:

³⁵ Տէ՛ս Տեառն Անանիայի Հայոց կաթողիկոսի Յաղագս ապստամբութեան տանն Աղուանից, էջ 141–144: Ստ. Օրբելյանը երդմնագրի ամբողջական բովանդակությունը ավելորդ է համարում մեջբերել՝ ասելով, որ այդ գրությունները ամբողջությամբ կան «Գիրք թղթոցում», որը կազմել է Անանիան՝ «Հավատո նմակ» անունով (տե՛ս Ստեփաննոսի Միւնեաց Եպիսկոպոսի Պատմութիւն Տանն Սիսական, գլ. ԾԱ, էջ 208):

³⁶ Ստեփաննոսի Միւնեաց Եպիսկոպոսի Պատմութիւն Տանն Սիսական, գլ. ԾԱ, էջ 208:

Մակայն կաթողիկոսը չի բավարարվում սոսկ հավատարմության գրով, նս մեկ նախազգուշական և պատժիչ գործողություն է ձեռնարկում. նա Սյունյաց աթոռը զրկում է նախկինում վայելած պատիվներից, որոնք էին «զիսաչն որ զառաջն տանէին, և զգաւազանն բազմածախ և մեծագին, և զբազմականն ոսկեթել զորս ընդ ինքեանց շրջեցուցանէին, զսահմանեալն յառաջին թագաւորաց և ի հայրապետաց Հայոց»³⁷: Որպէս Հայ եկեղեցու բարձրապատիվ աթոռներից մեկը՝ Սյունյաց եպիսկոպոսությունը հիշյալ առանձնաշնորհումները ստացել էր դեռևս 607 թ. Դվինի եկեղեցական ժողովում Աբրահամ Աղբաթանեցի կաթողիկոսի (607–615) ձեռամբ³⁸:

Ի վերջո, հայոց եռանդուն և բազմափորձ հայրապետին հաջողվում է վերջ դնել տասնամյակներ շարունակվող հայ եկեղեցու երկփեղկվածությանը և վերահաստատել սահմանված նվիրապետական կարգը: Անթաքոյց ուրախությամբ և առանց ավելորդ բառերի այս մասին պատմում է Ստ. Օրբելյանը՝ արձանագրելով, որ վերացավ եկեղեցու մեծ խռովությունը և խաղաղություն եղավ «կեղեքեալ և տառապեալ ազգիս Հայոց», խոտորվածներին վերստին միավորեց և հանձնեց սուրբ Լուսավորչի գահի ժառանգորդների տնօրինությանը³⁹:

Հայ մատենագիրներից ոմանք և նրանց հետևողությամբ որոշ ուսումնասիրողներ հակված են Հակոբ եպիսկոպոսի քայլերը մեկնաբանել զուտ դավանանքային տեսանկյունից՝ ասելով, որ նա շեղվել էր հայ եկեղեցու ճշմարիտ վարդապետությունից և հարել էր քաղկեդոնականությանը⁴⁰: Այս մեղադրանքի առաջին հեղինակը հենց Անանիա Մոկացին է, ով իր նշանավոր աշխատության ընդարձակ ու մանվածապատ ներածականում Սյունիքում և Աղվանքում խաթարված մթնոլորտի պատճառ է համարում քաղկեդոնական աղանդը, սակայն չի բերում հիմնավոր փաստեր: Մեր կարծիքով՝ խնդիրը պետք է քննել առա-

³⁷ Նույն տեղում:

³⁸ Տե՛ս Վ. Ալեքսանյան. Սյունյաց եպիսկոպոսական աթոռը VII դարի առաջին կեսին. – «Բանբեր Երևանի համալսարանի», Հասարակական գիտություններ, 2010, -1, էջ 38: Վ. Հացունին, ով Սյունյաց աթոռի մետրոպոլիտական կարգավիճակ ունենալն անհիմն համարում է Սյունյաց պատմիչի «սովորական մեծամտությունը», գտնում է, որ Սյունյաց աթոռը մետրոպոլիտական պատիվը ստացել էր Աղվանքի կաթողիկոսներից, այսինքն այն ժամանակ, երբ Հակոբը սկսել էր ձեռնադրություն և մեռն ստանալ Աղվանքի կաթողիկոսությունից, այն է՝ 930-ական թվականներին (տե՛ս Վ. Հացունի. Գարեւոր խնդիրներ հայ եկեղեցու պատմութենէն, Վենետիկ, 1927, էջ 283–285):

³⁹ Տե՛ս Ստեփաննոսի Միսնեաց Եպիսկոպոսի Պատմութիւն Տանն Միսական, գլ. ԾԱ, էջ 209:

⁴⁰ Մ. Չամչյանը գրում է, որ Սյունյաց Հակոբ եպիսկոպոսը հարում էր Թոնդրակեցիների աղանդին (տե՛ս Մ. Չամչյանի. նշվ. աշխ., էջ 828):

ջին հերթին Հայաստանում ընթացող քաղաքական իրադարձությունների ետնախորքում:

X դարում Բագրատունյաց թագավորների ջանքերը՝ ամբողջ Հայաստանը միավորել մեկ միասնական կենտրոնացված պետության շրջանակներում, բախվում էին ներքին և արտաքին ուժերի դիմադրությանը: Ջարգացած ավատատիրության ժամանակաշրջանում բոլոր երկրներում գերիշխող են եղել ավատատիրական մասնատվածությունը և կենտրոնախույս ձգտումները: Նույն օրինաչափություններին ենթակա էր նաև Հայաստանը: Իրար ետևից ձևավորվեցին Վասպուրականի (908 թ.), Վանանդի (963 թ.), Տաշիր-Չորագետի (978 թ.) թագավորությունները: Քաղաքական մասնատվածության պայմաններում նպաստավոր հող էր ստեղծվել նաև հայ եկեղեցու տրոհման ու թեմերի ինքնուրույն գործելու համար: Քաղաքականապես ուժեղ և խոշոր նահանգների եպիսկոպոսական աթոռները սկսում էին հանդես բերել անջատողական նկրտումներ: Շատ հաճախ այս քայլերը խրախուսվում և օժանդակություն էին ստանում հարևան պետությունների եկեղեցիների կողմից: Բնականաբար, հարևան երկրներից ներթափանցել են տարբեր աղանդներ⁴¹: Աղանդավորները ինչ-ինչ գործեր ձեռնարկել են, փորձել ձևավորել սեփական հոգևոր համայնքներ, սակայն դրանք ընդունելություն չեն գտել Սյունյաց աշխարհում, հետևաբար, Հակոբ Ա-ն չի հարել որևէ աղանդի: Այս կարծիքը հաստատվում է այն փաստով, որ Հակոբ Ա եպիսկոպոսը, ունենալով Սյունյաց իշխանների գորակցությունը, ինքն է դաժանորեն ճնշել Տաթևի վանքի մերձակա գյուղերի բնակիչների ապստամբությունը: Վանքից ոչ հեռու՝ Ավելադաշտ բարձունքի վրա, գտնվում էր ոճրագործներով լցված մի ավազականոց, որը անհանգստություն էր պատճառում միաբաններին ու շրջակայքին: Ջենքի ուժով արտաքսելով նրանց այդ հողակտորներից՝ Հակոբը դրանք սեփականում է հոգուտ վանքի: Ահա թե ինչ է գրում այդ մասին Ստ. Օրբելյանը. «Յայնժամ խնդրե՛ եպիսկոպոսն յիշխանացն Սիւնեաց և հրաման առեալ՝ հալածական արար զարսն, քանդեալ աւերեաց զապստամբանոց նոցին և հիմնախիլ արար, և գտեղին սահմանովն սեպհականեաց եկեղեցւոյն, և մեծամեծ և ահագին նզովիւք փակեաց, զի մի ոք այլ իշխեսցէ անդ բնակիլ կամ շինութիւն առնել»⁴²:

Այս շրջանում քաղաքական մասնատվածության պայմաններում Հայոց կաթողիկոսությունը չուներ մշտական աթոռանիստ: Հայոց կաթողիկոսները բառացիորեն թափառական էին, գավառից գավառ էին

⁴¹ Այս շրջանում առավել մեծ վտանգ էր ներկայացնում թոնդրակեցիների աղանդը (տե՛ս Ն. Աղ ո ն ց. Երկեր, Զ, Հանրագիտարանային հոդվածներ, Երևան, 2012, էջ 345):

⁴² Տե՛ս Ստեփաննոսի Սիւնեաց Եպիսկոպոսի Պատմութիւն Տանն Սիսական, գլ. ԽԸ, էջ 188:

անցնում, վանքից վանք, և իրենք էլ չգիտեին, թե որտեղ են հայտնվելու հաջորդ օրը⁴³: Այս թափառումների մասին հավաստի տեղեկություններ է հաղորդում Հովհաննես Դրասխանակերտցի կաթողիկոսը⁴⁴: Նույն փախստական ճակատագիրն են ունեցել վերջինիս նախորդած և հաջորդած կաթողիկոսներ Գևորգ Գառնեցին (877–897 թթ.), Մաշտոց Եղիվարդեցին (897–898 թթ.), Ստեփանոս Բ Ռշտունին (929–930 թթ.), Թեոդորոս Ա Ռշտունին (930–941 թթ.)⁴⁵: Այսպիսի պայմաններում ինչպե՞ս կարող էր և որտե՞ղ պետք է ներկայանար Սյունյաց եպիսկոպոսը, ստանար մեռոն և ձեռնադրություն, հայտներ իր հպատակությունը: Իրականում Հակոբ եպիսկոպոսին Անանիա Մոկացի կաթողիկոսը հայածում էր ոչ թե թոնդրակեցիներին կամ քաղկեդոնականներին հարելու, այլ մեռոնը Աղվանքից ստանալու և տասանորդը հայրապետական աթոռին չվճարելու համար⁴⁶:

Մյուս կողմից, ինչպես վերը նշեցինք, չպետք է անտեսել քաղաքական գործոնը. Հակոբի կենտրոնախույս նկրտումները պայմանավորված էին Սյունյաց նահանգի այն հաստուկ դերով ու դիրքով, որ նա կատարում էր Հայաստանի քաղաքական ու տնտեսական ասպարեզներում: Մյունիքը առանձին թագավորության ստեղծման շեմին էր, մնացել էր ընդամենը մի քանի տարի, որ Սյունյաց գահերեց իշխանը բազմեր թագավորական գահին: Իր հերթին փառասեր Հակոբ Ա եպիսկոպոսը, հավանաբար, երազում էր ձեռք բերել Հայաստանի հոգևոր առաջնորդի գավազանն ու աթոռը⁴⁷: Այսինքն՝ եկեղեցու կենտրոնախույս քաղաքականություն վարելը պայմանավորված էր աշխարհիկ իշխանության քաղաքականությամբ:

Հակոբ Ա եպիսկոպոսի գործի լուսաբանումը միակողմանի և թերի կլինի, եթե չանդրադառնանք նրա շինարարական, տնտեսական հսկայածավալ գործունեությանը, որի արդյունքը Սյունյաց աշխարհում վանքերի և եկեղեցիների ծաղկումն ու շենացումն էր, եկեղեցական սեփականության ավելացումը: Մկգբնադրյալները վկայում են, որ նա եղել է եկեղեցական գործի հմուտ կազմակերպիչ: Նրա կազմակերպչական եռանդուն գործունեության շնորհիվ կարգավորվել է Սյունյաց թեմի հոգևոր կյանքը, կանոնավորել հոգևոր դասը, աշխուժացել թեմի տնտեսական կյանքը, և եկեղեցին դարձել է մեծ կարողության տեր:

X դարի առաջին տասնամյակներին Սյունյաց եպիսկոպոսարանը Հայաստանի ավատական խոշոր կազմակերպություններից մեկն էր: Տիրանալով Տաթևի վանքի շրջակա գյուղերին՝ Սյունյաց եպիսկոպոսները ձեռնամուխ են լինում խոպան հողերի մշակմանը: 932 թ. Հակոբ եպիսկոպոսը բանակցություններ է վարում Փիլիպե 2-րդ գահերեց իշխանի հետ և նրանից 12 հազար

⁴³ Տե՛ս Բ. Ուլունբաբյան. նշվ. աշխ., էջ 164:

⁴⁴ Տե՛ս Հովհաննես Կաթողիկոս Դրասխանակերտցի. Հայոց պատմություն, աշխարհաբար թարգմ. և ծանոթագրությունները Գ. Թոսունյանի, Երևան, 1996, էջ 266–267, 272–273, 280–281:

⁴⁵ Տե՛ս նույն տեղում, էջ 164–165:

⁴⁶ Տե՛ս Գ. Գրիգորյան. Մյունիքի վանական կալվածատիրությունը IX–XIV դարերում, Երևան, 1973, էջ 228:

⁴⁷ Տե՛ս նույն տեղում:

դրամով ու մեկ «մեծագին գոհարով» գնում է Վարարակի ակունքը⁴⁸: Կառուցելով մոտ 29 կմ երկարություն ունեցող Վարարակի ջրանցքը՝ ռոտգելի է դարձնում Որոտան գետի ձախ ափին գտնվող Ցաքուտ անունով խոպան դաշտի, այնտեղ գտնվող եկեղեցու հողերը⁴⁹: Հիրավի, սա շինարարական տեսանկյունից բարդ և վիթխարի ծախս պահանջող ձեռնարկ էր, որը հաջողությամբ ավարտին է հասցնում Հակոբ եպիսկոպոսը: Իր արձանագրության մեջ Փիլիպեն շեշտում է, որ Հակոբը «վճարեաց զամենայն գինն ողջամբ»⁵⁰: Կառուցված ջրանցքի շնորհիվ այդ փշածածկ վայրը դառնում է «վարդուտ»: Այդ առթիվ Ստ. Օրբելյանը հիացմունքով արձանագրում է. «Տնկեաց (Հակոբ եպիսկոպոսը – Վ. Ա.) բազում այգիս և որթս սորեկս, էարկ տունկս զանազան պտղաբերաց՝ ձիթենիս և թզենիս և նոնենիս և յամենայն մրգաբերաց արար դրախտս զարմանալիս, և զարդարեալ զբոլոր վայրն ընդարձակագոյն թանձրախիտ ծառովք և քաջուղէշ որթովք ի վայելումն եղբայրութեանն և ի պէտս ամենայն կարօտելոց և աղբատաց»⁵¹: Կարևորելով իր կառուցած ջրանցքի նշանակությունը՝ Հակոբ եպիսկոպոսն արձանագրության մեջ սահմանում է նաև ջրանցքից օգտվելու կարգը և նշում շրջակա այն գյուղերի անունները, որոնք իրավունք չունեն օգտվել վանքապատկան ջրանցքից. «Եւ չկայ այս ջրոյս հաշի ոչ Նորեցեաց, ոչ Խոտանեցեաց, ոչ Շնհերացեաց կամ Հալեցեաց, ոչ այլ մարդոյ, ոչ յարտ կտրել և ոչ ի մարգ և ոչ պարտիզի ջուր տալ՝ զատ ի մատակէդ ըմպելոյ մարդոյ և անասնոյ»⁵²: Այս որոշումը ուժի մեջ է մնում նաև Հակոբից հետո պաշտոնավարած առաջնորդների օրոք:

Տեր Հակոբը շինարարական գործունեություն է ծավալում նահանգի տարբեր գավառներում, բայց եկեղեցաշեն գործունեության առանձնահատուկ ասպարեզ է դառնում Վայոց Ձորը՝ Սյունիքի իշխանանիստ կենտրոններից մեկը: 929 թ. Վայոց Ձոր գավառում՝ Եղեգիսի հովտում՝ Ոստինք գյուղից քիչ վերև, Հակոբը Սյունյաց իշխանաց իշխան Սմբատի և նրա տիկին Սուփիայի աջակցությամբ ձեռնարկում է եկեղեցու շինարարությունը⁵³: Տեղանքը շատ հարմար էր և անվտանգ: Եկեղեցին զարդարում է զանազան երանգներով ու գեղեցիկ պատկերներով «և կոչէ զՍմբատ և զՍահակ ի նաւակատիս տաճարին»⁵⁴:

⁴⁸ Դա այժմյան Գորիս քաղաքի Ակներ կոչված վայրից բխող ջուրն է, որ թափվում է Որոտան գետը (տե՛ս Գ. Գրիգորյան. նշվ. աշխ., էջ 112, հմմտ. Ստեփաննու Օրբելյան. Սյունիքի պատմություն, էջ 475, ծան. 734):

⁴⁹ Տե՛ս Ստեփաննուսի Սիւնեաց Եպիսկոպոսի Պատմութիւն Տանն Սիսական, գլ. ԽԸ, էջ 185, տե՛ս նաև Գ. Գրիգորյան. նշվ. աշխ., էջ 112:

⁵⁰ Ստեփաննուսի Սիւնեաց Եպիսկոպոսի Պատմութիւն Տանն Սիսական, էջ 187:

⁵¹ Նույն տեղում, էջ 185:

⁵² Նույն տեղում, էջ 186, 187: Հայաստանի բնակչության պայմաններում ջուրը միշտ էլ եղել է կենսական խնդիր: Ըստ հիշատակությունների՝ ջրօգտագործման համար միջնադարյան Հայաստանում եղել են վեճեր ու կռիվներ (տե՛ս Գ. Գրիգորյան. նշվ. աշխ., էջ 114, ծան. 357):

⁵³ Դա Շատիկի վանքն է՝ կառուցված Հակոբ Ա-ի կողմից: Այստեղ նա նաև մեկ եկեղեցի է կառուցել, որը վերակառուցվել ու իր վերջնական տեսքն է ստացել 1665 թ.: Այդ եկեղեցին ներկայումս կանգուն Ս. Սիոն եկեղեցին է (տե՛ս Ա. Մկրտչյան. Էջեր Սյունյաց աթոռի պատմությունից, Ս. Էջմիածին, 1995, էջ 81):

⁵⁴ Ստեփաննուսի Սիւնեաց Եպիսկոպոսի Պատմութիւն Տանն Սիւնեաց, էջ 188–189:

Սյունյաց իշխանը նորակառույց հաստատությանն է նվիրաբերում բավակա-
նաչափ կալվածքներ, ծաղկանոցներ և արտեր:

Մ դարի կեսերին Սյունյաց լեռներում կային բազմաթիվ ճգնավորներ, ո-
րոնք բնակվում էին քարայրներում ու ծերպերում: 936 թ. իր գահանիստ Եղե-
գիս գյուղաքաղաքի շրջակայքում որս անելիս Սմբատ իշխանը Քարեվանքի
մոտ հանդիպում է ճգնավորների՝ «դողեալ ի ծերպս»: Հակոբ Եպիսկոպոսի
միջնորդությամբ Սմբատն ու իր տիկին Սուփիան նրանց համար կառուցում են
եկեղեցի՝ սուրբ Գրիգոր Լուսավորչի անվամբ: Նախկին ճգնավորների համար
հիմնադրվում է վանական նոր միաբանություն: Սուփիա իշխանուհին նորա-
կառույց Հերմոնի վանքին նվիրատվություններ է անում, ընծայում հասութա-
բեր հաստատություններ. «Եւ բարեպաշտ տիկինն Սուփիա գնէ զգիւղն Հաւու,
որ հանդէպ վանիցն կայ իւր սահմանովն՝ և տայ ի ժառանգութիւն եկեղեցոյն,
և այլ ևս այգիս և ծաղկոցս յԵղեգիս: Եւ կոչեն զտեղին յանուն ծերոյն Ահերմոնի
վանք»⁵⁵: Հարկ է նշել, որ այս վանքի նշանավոր միաբանները մեծ դեր խաղա-
ցին 1441 թ. հայոց կաթողիկոսական աթոռը Կիլիկիայից Էջմիածին փոխադ-
րելու գործում:

Ճգնակյացների մի մեծ խումբ էլ ծվարել էր Գնդեվանք կոչված անմատչելի
ձորերում: Նրանք ամբարել էին սուրբ նահատակների մեծաթիվ նշխարներ և
հրաշագործություններ էին կատարում՝ բժշկելով անբուժելի համարվող հի-
վանդներին: Իշխանուհի Սուփիայի հանձնարարությամբ տեղ հանձնարվում է
ձեռնարկվում է նոր վանքի շինարարությունը: Ահա թե ինչ է պատմում այդ մա-
սին Ստ. Օրբելյանը. «Կանգնէ զտունն Աստուծոյ և նկարակերտ յօրինուածովք
զարդարեն զառաստաղս և զորմունս նորա. և արարեալ նաւակատիս՝ մեծա-
հանդէս ժողովով օրհնեն զնա և անուանեն անուանակոչութեամբ սուրբ վկա-
յիցն. և կացուցանեն ի նմա դասս պաշտօնէից և բազմութիւն կրօնաւորաց»⁵⁶:
Վանքն անվանվում է Գնդեվանք, որի վերակացուն Սահակ քահանան էր,
գործակալը՝ Եղիշա նկարիչ քահանան, իսկ ընդհանուր հոգաբարձությունը
վարել է Հակոբ Եպիսկոպոսը: Գնդեվանքի սքանչելի եկեղեցու կառուցման
կապակցությամբ Սուփիա տիկինը փորագրել է տալիս հատուկ արձանագ-
րություն, որն ավարտվում է հետևյալ պերճախոս համեմատությամբ. «Մա-
տանի էր անակն Վայոց ձոր, – շինեցի զսա և եղի ակն ի վերայ»⁵⁷: Ինչպէս նա-
խորդ վանքերի և եկեղեցիների դեպքում, այստեղ նույնպէս աշխարհիկ իշխա-
նությունները հոգ են տանում եկեղեցու տնտեսական կարիքների համար, և
Սուփիա տիկինը վանքին է նվիրում բավարար չափով շարժական ու անշարժ
գույք՝ ազատելով դրանք հարկերից և տուրքերից:

Նկատենք, որ Հակոբ Ա Եպիսկոպոսի նշանավոր ձեռնարկներից մեկն էլ
930 թ. Տաթնի մայր եկեղեցու վերանորոգումն էր և վերջինիս նոր շուք հաղոր-
դելը: Այս գործի համար նա ոչինչ չխնայեց և, հսկայական ծախսեր կատարե-
լով, հեռավոր երկրներից հրավիրեց «Ֆռանգ ազգաւ» նկարիչների ու ճարտա-
րապետների: Վերջիններս ամբողջությամբ վերանորոգեցին և նորովի նկարա-
զարդեցին տաճարը. «Նմանապէս և զբոլորն համակ զարդարեաց այնքան, զի

⁵⁵ Նույն տեղում, էջ 189–190:

⁵⁶ Նույն տեղում, էջ 190:

⁵⁷ Նույն տեղում, էջ 191:

տեսողաց տեսարանքն շլանային ի նայելն. և երբէք ոչ թուէր ի դեղոց և յերանգոց յօրինեալ, այլ համայն կենդանիք, յորոց զարհուրեալք խուսափէին տեսողքն»⁵⁸: Կատարված գործն այնքան նշանակալից էր, որ Հակոբ Ա եպիսկոպոսը երկրորդ նավակատիք կազմակերպեց⁵⁹: Այն իր ճոխությամբ գերազանցեց առաջինին: Պատկերները սրբագործելու և օրհնելու համար վանքի նավակատիքին հրավիրեց հայոց կաթողիկոս Հովհաննես Դրասխանակերտցուն: Վերջինս բազմաթիվ եպիսկոպոսներով ու իշխաններով ներկա գտնվեց մեծաշուք հանդեսին:

Այսպիսով՝ փաստերի հանգամանալի և համակողմանի քննությունը թույլ է տալիս իրական լույսի ներքո գնահատել X դարի Սյունյաց աթոռի նշանավոր առաջնորդներից մեկի՝ Հակոբ Ա եպիսկոպոսի գործունեությունը: Թե՛ իր կրոնադավանաբանական, թե՛ շինարարական-կազմակերպական գործունեությամբ տեր Հակոբը մեծ դեր է կատարել Սյունիքի եպիսկոպոսության ամրապնդման և ուժեղացման գործում: Նախաձեռնել է եկեղեցական մեծածավալ շինարարություն՝ Սյունիքը հարստացնելով հոգևոր-մշակութային ու կրթական նորանոր հաստատություններով և հող է նախապատրաստել հետագա շրջանի Սյունյաց հանրահռչակ հոգևոր-կրթական հաստատությունների ձևավորման համար:

О ДЕЯТЕЛЬНОСТИ ЕПИСКОПА АКОПА І СЮНИКСКОГО (918 — 958 гг.)

ВАРДАН АЛЕКСАНИЯН

Резюме

Епископ Акоп Сюникский — один из знаменитых духовных предводителей Сюникской епархии X века, названный армянскими историографами «мятежником» и «еретиком». Его усердная и плодотворная деятельность способствовала развитию и усилению Сюникского епископата. Согласно средневековым армянским письменным источникам, в период его предводительства (918—958 гг.)

⁵⁸ Նույն տեղում, էջ 187:

⁵⁹ Տաթևի վանական համալիրի շինարարությունը նախաձեռնել և ավարտին է հասցրել Սյունյաց Հովհաննես Ե եպիսկոպոսը (885–918): 895 թ. սկսում է Տաթևի մայր տաճարի՝ Պողոս-Պետրոսի կառուցումը: Շինարարությունը տևում է 11 տարի և ավարտվում 906 թ.: Ձուգահեռաբար կառուցվում են գրատներ, սրբատներ, գետնափոր գաղտնարաններ, սեղանատներ: Տաճարի նավակատիքին առատ ընծաներով մասնակցում են Հայոց երկրի աշխարհիկ և հոգևոր բոլոր տերերը՝ Սմբատ Ա-ի (890–914) և Հովհաննես Դրասխանակերտցի (898–929) կաթողիկոսի գլխավորությամբ (տե՛ս Ստեփաննոսի Միսնեաց Եպիսկոպոսի Պատմութիւն Տանն Միսական, գլ. ԼԹ, էջ 165, Գ. Գրիգորյան. Սյունյաց եպիսկոպոսների շինարարական գործունեությունը (IX–XIV դարեր).– ՊԲՀ, - 2–3, 1999, էջ 167):

временно прервалась связь между армянским патриаршеским и Сюникским престолами. Прерывание отношений было обусловлено политическими и экономическими факторами, которые имели место в Багратидской Армении в X веке. После длительных переговоров Католикосу Армении Анания Мокаци (946–968 гг.) удалось наладить и восстановить прежние иерархические отношения между двумя престолами. Особенно плодотворной была деятельность епископа Акопа в области церковного строительства. Он обогатил Сюникскую область новыми великолепными монастырями и церквями. Сюникская церковь укрепила свое положение, став собственником огромных имений. Новые монастыри и церкви стали духовно-культурными и образовательными центрами для всей Армении. Эти заведения подготовили почву, на которой в будущем сформировались прославленные сюникские средневековые школы.

ON BISHOP HAKOB I SYUNETSI'S ACTIVITIES (918–958)

VARDAN ALEXANYAN

S u m m a r y

Bishop Hakob Syunetsi is one of the famous religious leaders of the Syunik eparchy of the 10th century, named by the Armenian ecclesiastical historiographers “insurgent” and “heretic”. His assiduous and fruitful activities promoted developing and strengthening the Syunik episcopate. According to medieval Armenian written sources during his reign (918–958) the relations between the Syunik and the Armenian patriarchal thrones were temporarily broken off. The break of the relations was connected with political and economical factors which existed in the Bagratid Armenia in the 10th century. After long negotiations Armenian Catholicos Anania Mokatsi (946–968) succeeded in arranging the situation and rehabilitated the former hierarchic relations between two thrones. Bishop Hakob's activities was especially fruitful in church constructing. He enriched the Syunik region with luxurious monasteries and churches. The Syunik church strengthened its position, becoming the owner of great possessions. New monasteries and churches became religious-cultural and educational centres for Armenia. These manuals paved the way for forming in the future famous medieval institutions of Syunik.